

T5419/0160(10)

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
OCT 31 1940

慎修堂集卷之十八

河汾亢思謙子益著

誌銘

壽官肖溪趙公墓誌銘

趙翁諱玘字元明號肖溪絳之三林中里人前
尹富平嶧山公之父也初嶧山甫踰冠舉吾晉
鄉試第二人連舉進士過予於都邸朗然玉映
退讓君子也心竊儀必世德是承者比里居每
值姻鄙自絳旋則聞翁及厥考淳厚朴茂之詳

哈佛大學漢和
圖書館珍藏印

暨翁父子慈孝雍和之狀私心恒嚮往之頃外
姪盧君體治手嶧山書以翁誌銘屬予為驚悼
不能已蓋傷善士之萎云按憲使小溪孫公狀
趙之先本潞人國初諱三者徙居絳三生延世
延世生彬彬子二長曰昶昶子四仲曰二二子
五長曰頊演子三季曰統翁之父也號溪翁配
馮氏溪翁慷慨好義賈茶馬于西寧積穀數千
石值歲凶減直以糶拾遺金訪其主還之語載
學使方山薛公表中翁少有異資讀孝經論語

日記千言旁獵衆技如九章之類悉通其理以
父久旅邊獨奉母居勤動門戶弗克竟其所之
乃力田為養節約自持家用以饒父素好施予
自河外垂橐歸翁承順志意務得其懽時三林
毛公謝涇邸長史還重翁父日與遊嶧山甫髫
年翁命從毛公受小學四書毛公奇嶧山韶秀
許妻以女孫有王生魏者亦從毛公雋拔有聲
翁以女妻之嶧山復受尚書於王講業州城資
給備至嶧山魏科蚤奮本翁訓誨力也癸丑秋

嶧山授令富平迎翁就養宦舍翁每諭之曰汝荷國寵靈作民父母曷以子視民乎毋淫刑以戕其命毋濫用以傷其心嶧山祇奉訓言故清靜寬仁終始不易乙卯冬翁以入覲有典常先期戒家人歸迺朝議謂關陝邇也留守令勿往歲暮地大震官舍傾頽罹禍者莫可計而翁獨先期行若或相之云丁巳夏嶧山以忤部使者意被言歸翁欣然曰吾不欲汝以祿養久矣為下民而獲咎於上官又何尤焉乃構精舍

俾嶧山羣鄉士之彥者日論文考德於中躬率僮僕治田畝供賦稅優游養和終歲不入城郭州守高其行延為鄉飲賓一往不復至萬曆改元翁壽八袞矣署州太原二守王君奉詔榮

翁為壽官扁于門曰恩旌耄德州守李君復表其門曰明時義士蓋翁失配十餘年矣蕭然獨處僮婢一不至其室二題君子謂稱情焉居鄉閭以正直聞人多諒其悃悞凡有紛難率就之平親鄰有婚喪不能舉者必為周給負貸者至

不責其償州里德之年逾八袞視明聽聰健步
善飯尚能作細書人望之若仙然萬曆丁丑冬
至日遘疾乃命嶧山祀家廟蓋歲時祭享必躬
親不他屬也病革呼嶧山曰汝年已逾艾吾無
可虞惟訓迪後人毋蹈非義耳言畢而逝十一
月十二日也生弘治癸丑七月十四日得壽八
十有五配馮氏有淑德先翁卒子一即嶧山名
桐娶毛氏即長史孫女繼靳氏處士王女女三
長適同里侯征次即王魏今交城王府教授季

適三林南里閻璠孫男三熠州庠生娶陶氏少
保恭介公曾孫庠生冶女耀聘張氏獻縣主簿
東康子太學生永泰女俱靳出煥尚幼側室張
出孫女一適州廩生王庄王之屏毛出曾孫男
二坊坪俱熠出夫翁質直篤行三世罔渝是宜
遐壽康寧門閥光大孫子逢吉而蕃衍若此也
嶧山下戊寅二月十五日安葬于郭西先塋與
馮孺人合焉乃為之銘曰幽居恬泊兮嘉遯
徜徉貴不于躬兮令聞用章佑啟後人兮如珪

如璋求我庶士兮倩孔良踰耄望九兮而色而
康作德食報兮福履允臧汾水東馳兮松栢蒼
蒼千萬斯年兮尚武隱君子之藏

九品散官乾渠盧公暨配孺人衛氏楊氏

遷葬墓誌銘

乾渠盧公既葬十禩餘矣其子向明今年秋得
吉壤卜期奉遷乃敘狀而徵銘於予予前室
勅贈孺人為公從女弟習聞公懿行銘奚可辭
公諱應瑞字慶甫號乾渠世為太平西侯右族

勝國時有諱仲寬者行誼著邑中生子二次曰
管卿管卿子四季仕昇子二長恭義樂善
循理蔬素終身鄉以善士稱子四季攷淳朴無
華讓父產於諸兄力穡居積晚益饒裕乃輸粟
授義民爵子一諱登號西麓公考也蚤游邑黌
入國學講藝締交多海內名雋豪爽伉直不能
為阿態軟言尊禮賢士夫問遺恒溢所願待族
姻尤有恩振饑周困好行其德終無倦容郡以
義表于門邑推賢列于傳君子以為當云公西

麓翁仲子幼即識鑒敏達年十五西麓翁委以家務經理區畫無不當父心者西麓翁好招延名勝至輒投轄為懽公周旋左右肆筵授几食飲豐甘卜夜留懽立侍彌恪賓朋稱賞忻忻如也予早歲往來甥館竊識公宴息率丙夜甫昧爽則公履聲周歷庭除飭汛掃起傭賃趨田作矣西麓翁義問既高遂為忌者中以奇禍公罄奩中資經營司事者誣竟以白母闕孺人遘危疾厭湯藥公長跪床下頓首請必盡啜乃興伯

兄亦太學生嘗為炮火延藝疾幾殆公奔走求醫至廢寢食復躬禱太和山得奇方乃愈嘉靖戊申西麓公卒公哀慟不欲生明年伯兄亦卒喪葬諸勞心計力殫罔或不虔撫幼姪與已子無少殊時時泣諭之曰汝吾宗冢孫也守先世之成紹汝祖之烈尚克念哉姪為感奮游邑庠上辟雍若公訓云公省約自居厭綺靡之習嘗受九品告身冠服不一御與鄉人居恂恂溫謹退然若不勝衣自結髮至斑白惡聲未或至舉

向明也晚不以愛緩教延名師盛禮遇復躬勤督課篝燈共室業不精不寐也向明刻厲自樹博雅有雋聲高舉可矣惜公未及見耳公生以正德丙寅十月九日卒以嘉靖辛酉五月二日得年五十有六配衛氏北牀處士表女端凝誠恪拮据佐公振其家年甫踰壯即力贊公納副室楊氏是生向明孺人撫之忘為楊出子依依瞻戀亦忘非孺人出也楊為故城處士敬宗女精女紅勤中饋事長君婉婉順從退讓自牧終

身無間言里鄙兩賢之生子一即向明娶襄陵衛氏繼臨汾張氏再繼襄陵邢氏女二一蚤卒一適襄陵邢一枝孫男三肇傳聘故城醫官鄧應奎女張出次先傳我傳孫女一俱幼皆邢出衛孺人生以正德戊辰四月十二日卒于隆慶丁卯五月二十七日得壽六十歲楊孺人卒則嘉靖甲子四月十五日距生正德庚辰十一月二十日年四十有五公初未病時日行營壽藏竟未有獲既而及二孺人先後卒則各以卒之

年十二月葬于先塋之右塋邇澗河迺澗日南
蝕向明虞為水所齧而堪輿家時亦為言萬曆
丙子冬十月向明夢公偕弟起甫並立若平生
呼而語之曰棺蓋敞為吾易覺而心動質明起
甫無疾而終迺子向極購佳城葬焉向明每念
公有治命及感茲夢境愈皇皇求善地得于太
平莊之原迺以己卯十一月十四日奉公及二
孺人柩改葬焉銘曰 原之土厚而豐兮有魏
者丘維公遷之宮兮崇山西來聳龍從兮澗溪
縈迴氣鬱葱兮同室好合穴爾攸同兮作求世
德食報于其躬兮發祥流光行貫星虹兮式穀
綿綿允曰芝蘭之叢兮

聽選官雲泉田公墓誌銘

公諱萬伯字汝林姓田氏雲泉其別號公外舅
也吾晉之臨汾人曾大父濟大父興世有令德
父倉嘗輸粟塞垣授代藩典膳以純篤著於鄉
鄉之人稱曰河山公配張氏公季子也初河山
翁昆弟者五胥奮志於賈懷資各出西踰秦隴

北歷燕雲浮淮海而南久乃同即次維揚以鹽
賈賈業日益昌公獨居里中持門戶奉慈親恒
得懽心事二兄無違禮出而敦族交鄰融融如
也河山翁既倦游歸喜賓客公延致共談笑日
羞酒食時召歌舞為娛翁嘗病嗽湯藥必躬調
迺進時值怒或詬詈亦安然受之依依不忍違
初河山翁命公兄弟析產居公悉心舉廢不數
年愈拓以饒既乃慨然曰財所以足用也用足
已矣胡終歲馳驅去井邑遠父母耶遂悉以貲

畀里中人代化居於鴈門約均入其子息其人
恣費匿不數年所畀蕩然復冒侵官帑稱貸私
室踰數千金率假名於公司事者以公主名責
之償唯唯不復辨產既罄數尚未盈旁視率忿
懣不能堪令白諸官輒曰吾命也吾命也安之
耳天植誠朴絕無機械心復不習機械事與人
交敦信不欺亦不虞人欺已既中其欺亦不計
不悔也皆人所難者精九章之術退然不自衒
叩之隨應如指諸掌少時補藩省從事未幾厭

其勞乃循例實邊得需次天曹及生計消落銓
期已踰所親勸之仕則曰稗官散秩奚能益於
時吾豈干升斗祿僕僕為人役耶家徒壁立日
油油然無愠容杜門靜處若習養生家言者予
意期頤可卜也迺隆慶初元七月十二日以寒
疾卒年生弘治壬戌三月十日壽六十六云元
配劉氏生子一洵儀賓配西河鎮國中尉知焯
女雀山鄉君女一適公往奏史官績蒙 恩封
孺人繼宋氏生子一溶習舉子業配楊氏世爵

女女三一適鄭汝敷一適庠生高汝質一適賈
從禎再繼萬氏生子一瀾聘盧氏指揮岐鳳女
女二一許張思誠一幼孫男二可稼聘張氏洵
出可稔溶出女一尚幼洵等卜是歲九月十六
日葬公于辛莊之原從河山翁兆也乃涕泣以
狀而屬銘於公公奚忍銘公哉然義不能已也
乃杖淚為之銘曰 悅於親惟孝之純宜於人
惟德之醇蹶而弗爭惟心之仁克葆其真是曰
懷葛之民嘉遁弗耀胡值之叱厥祥爰發祚

之蕃勒銘室千萬世以永存

迪功郎直隸平山縣二尹素軒狄公墓誌

銘

素軒狄公者晉之臨汾人也諱錦字尚綱卒以嘉靖乙丑四月二十日公子用夏用賓以是年十一月九日葬公于七里村從先塋焉前事之月二子杖而乘門持狀請予銘予曰公行應銘法予又夙知公奚其辭往予家食時公命用賓來受易復時時過予竊識視公進止有常度無

忿色無誕詞與之考究文義上下古今間及民生疾苦便利率探索深淵洞極底裏而政疵民瘼尤舉置灼然每私念公才美若肩巨任其所樹立必能昭焯人耳目也歲甲辰公就選銓曹僅授平山丞司牧政邑民力素瘠閭戶困尤甚公掃苛細絕苞苴平政寬廉與之休息遂得士庶心時獨獺巖邑城久頽習不為備公署篆乃崇城浚隍除戎簡卒以為備人或迂視之無何果深入畿甸震驚而平邑獨無擾令其

者以嚴明自炫民日麗于法公婉辭導諭令輒為霽顏每曰吾不值于公幾不免于戾矣用是邑民愈益愛戴公問鄉及丞皆署上考部使者屢移檄旌之然公以勞苦無少休乃嘆曰夫仕以為人孰若退而自適吾又安能規規於五斗圖耶即日解冠裳跨馬歸同事及士民固挽之莫能得邑人迄今有遺思焉公幼即穎慧絕人年十四入郡庠為弟子員十八試于督學石公奇其文得廩食復從苑洛韓公遊六業日益邃廼七試于鄉無所遇嘉靖辛卯 詔天下貢士

各遴文行茂異者充之惟其人不惟其資蓋復國初貢舉並用之制特選之也所司校諸生無踰公者遂首薦焉需次十年餘持衡者執泥資途竟俾以丞終生平所負持未能大措諸行也謂之何哉曾大父順大父榮父進皆隱德不仕公獨以儒業起家弱冠時父旅卒維揚公聞訃悲慟幾絕乃馳詣東南水浮陸走迈櫬于家事母氏姚定省有恒出入必告侍甘旨問湯藥

輒先意順欲以得懽心終其身未或怠也春秋
既高每談及先人舊事即涕下沾襟嘗語二子
曰汝大父僅育予子然自立拮据俯仰多矣吾
幸有汝二人伯宜持門戶理家政仲宜嗣文學
振家聲咸務底于成毋廢半途可也復每戒之
曰毋逆親毋忽長毋崇侈靡以殄天物毋懷忮
刻以毒齊民天鑒非遙吾居常警惕恐類應不
誣也二子祇承公訓今各以善聞謂非有父有
子耶儉素自甘耻為華靡謙恭沉嘿退然若不

勝衣醇篤忠信之譽親疎無間言鄉鄰有疑者
多就之謀有爭辨者多就之決公剖析啟發不
數語即犁然當於人心自束髮至白首所與從
事者雖賢不肖不同卒莫與公有怨嫌也嘗有
以古陶器鬻者留而議其直數日不再至公曰
吾閱其情殊迫切胡踰期耶乃使人號于市值
器主曰頃以輸租困俾其代吾鬻其暴卒矣方
求吾器未獲也公厚其值畀之其他周人於急
濟人以資間值負者亦不屑屑計焉歸自平山

慎修堂集 卷之六 十一
即以家付子優游閭里者二十年得壽七十七
生以弘治己酉正月二日云配楊氏先公八年
卒生子二長即用夏娶陶氏次即用賓舉壬子
省闈高等娶李氏繼宋氏女一適宋國卿戊午
舉省科孫男三文光娶楊氏繼沈氏文耀娶劉
氏文采聘王氏女二一許儒生周繼棊皆用夏
出一適儒生張九德用賓出曾孫男一歸明文
光出夫身既康強而壽子孫復衆盛而賢公其
奚憾哉為之銘曰 古先詔爵論秀命鄉敦本

考實德進言揚科名歸重爰自隋唐操觚競巧
本實未遑猗歟 昭代損益百王科貢薦舉昭
示周行習沿時異乃戾典常 聖皇御極光復
舊章狄公蘊德顛顛叩叩譽隆州黨業擅膠庠
成均升進天宇翺翔論官銓氏 德意莫將因
仍常調佐邑冀方圉人不擾允矣循良詰兵捍
患偉績曷忘委身遂志奚必巖廊潔已勇退丘
壑徜徉踰七望八而壽而康有撫孫子如珪如
璋考祥孔備視履允臧高丘突兀良璞之藏勒

慎修堂集
卷六
四
銘貞石千祀之芳

典膳孝菴荀公孺人寇氏合葬墓誌銘

余少時則聞里中有荀公者以字行人稱為長者無間言邂逅值之退然篤厚君子也居無何以寒疾卒鄉人莫不咨嗟痛惜傷善士歿云公諱文質字彬之號孝菴曾祖矩祖俊父達世為臨汾著姓母張氏公少失父即總家政相時低昂修業而息之雅善擇人其人不可與財通遜避無所及值誠謹而善賈者輒畀以重貲聽其

出入不規規稽所為且薄嗜慾節服食與共事者同苦樂故能得人之力而舊業益充在母側愉色卑躬承意不少忤出而親禮賢士如恐不及遇宗鄙鄉鄰恂恂和順惟恐傷其意間有橫逆侵亦對之微笑而已故人終不忍侮焉卒以嘉靖甲午閏二月二十四日生則弘治壬戌四月七日得年三十三耳配寇氏邑處士讓女也方荀公歿時孺人年甫踰三十姑老在床蓐諸孤滿前長者方志學餘尚孩幼也孺人上奉病

姑曲為順適下撫諸子俾長者力于學次季則
孳孳為門戶計不令習于嬉至於肅閫闕理經
費給更徭種種中于度人視之不知荀公亡也
心殫於慮身職其勞者數十年若一日然晚歲
二子頽白日不離左右諸孫競奮一已舉于鄉
乃怡然曰吾庶幾可藉手以報夫君矣迺隆慶
辛未十月十四日以疾卒距生弘治甲子二月
二十一日得壽六十八子男三景哲國學生娶
程氏繼張氏再繼張氏景韶配陽曲臨水鄉君
為儀賓景祐先卒娶宋氏女三長適陽曲奉國
將軍表檀次適西河鎮國中尉知耿次適生員
劉守正孫男八建中生員娶張氏用中生員娶
趙氏秉中幼哲出執中生員娶李氏繼李氏時
中庚午舉人娶高氏允中娶宋氏協中娶阮氏
韶出應中娶張氏祐出孫女六一適陽曲鎮國
中尉知恠一許亢致中哲出一適生員段成文
一許于桂馥一幼韶出一適國學生郝世偉祐
出曾孫男六一龍聘姚氏執中出雲龍乘龍用

中出孟龍聘張氏從龍兆龍時中出曾孫女三一建中出一許段彩執中出一用中出皆幼景哲等卜以壬申正月四日合葬公孺人於賈莊祖塋之次葬有期哲帥弟及子若姪介鄉進士方齋王君徵銘於余余交國學文時中又年家之彥也義不可辭迺按王君狀而銘曰義誠貲贏壽矣奚傳富知禮節夙昔所先允美荀公通國稱賢年雖未售澤則世延婉婉淑媛矢志未已式穀爾嗣俾熾俾昌濟濟孫子玉樹金英亦既觀厥成亦既駿厥聲需時藏器可翼可憑是惟作善者之食報世篤其承

將仕佐郎鴻臚寺序班質菴宋公墓誌銘

嘉靖丙寅秋九月三日鴻臚序班質菴宋公卒于家既閱月其從弟大學君國風督從子源等將以是年冬十一月四日葬公于郭村祖塋之次與李孺人合焉迺手所次事狀過予以銘徵予辱公知近三紀矣仲子禧公家館甥也義何能辭銘哉公諱國文朝用其字質菴其號也宋

世為予邑著姓曾祖通祖宜父得仁皆隱於農
賈戮力治生家日以昌母張氏公幼而穎敏稍
長明達邁倫類作字有楷法可觀既為弟子員
遊國學考論古今禮樂典章見聞日益進每曰
丈夫當有事四方豈可齷齪守一丘耶於是南
浮淮海東涉齊魯北歷趙魏之郊所至必與賢
士大夫遊遇佳山水探訪幽奇徜徉終日忘歸
焉退則修家人產業令門客用卜河南之術以
豐其財貲遂甲里中然以素風自樂淡于榮味
絕無豪汰習至義所當為奮往不疑族黨姻舊
有困乏莫能自振者即出巨貲俾之轉輸貿易
以培植之然乾沒負公者比比旁視至不能夷
而公不與校亦不以是少自沮親疎遠近以緩
急告者惟其所須無不立應未嘗以他為辭券
契盈筭篋未嘗以責償為務或者至謂為迂而
公弗顧也生平慈祥樂易與羣從弟姪數十人
居怡怡愉愉終身無忿疾容色出則禮長和衆
隨貴賤無一失懽者雖橫逆或加竟恬不為意

乙丑夏謁選入都亭既而幡然曰往吾少壯時
欲沾一命以自見今已迫遲暮又安能僕僕為
人役耶以情白銓曹銓曹上聞詔授今職
以歸有其榮而無其勞君子以為高焉歸與諸
耆舊結社優游甚樂也迺以末疾遽不起距生
弘治壬戌十二月初二日壽六十五耳元配李
氏處士惟德女端肅明整裨內寔多先公七年
卒貳室張氏雒氏子男三漸聘盧氏偃師尹學
韶女湫聘亢氏長清少尹得霖女洙聘李氏儀

賓光孝女女一適陽曲鎮國中尉知烱孫女一
適西河鎮國中尉知烽惟公和厚而有容大積
而能散憂人之憂拯人之困庶幾古義士所為
者是宜享遐齡而介景福也迺壽未稱德且子
尚幼也悲夫為之銘曰大道既遠民習競私
一膜之外秦越乖離猗歟質菴古誼自持罔驕
罔嗇樂予好施仁聲卓行所思匪夷金閨初試
勇退為儀壽雖少歎名則昭垂式求古道尚考
于斯

伯考七品散官玉溪府君合葬墓誌銘

府君諱逢霈字天福姓亢氏玉溪其別號也河東臨汾人曾祖諱貴祖諱通代有隱德父諱昇以貢入國學授靈壽主簿董薪廠于易州規畫綜覈卓出時儕大司空以為難薦於銓曹曰才堪大受抑在下僚宜艱重厥肩以章丕績乃稍遷兗州府知事俾總一郡薪政焉居無何以内艱歸服闋不復出宴息丘樊踰二十年以壽終配魏氏生子四府君長次則先編修公也府君

早端確承庭訓喜誦書通諸史業精熟事父母以孝稱弱冠值諸叔飛輓實邊慨然請從遂受齏符賈淮海謹飭自樹兢兢恐弗當諸叔心終日戶闕無輕出一錢尺帛取予必與家衆同之不侵為己私真率恂悞略無游詞飾態諸叔交予其賢貽書為先祖慶焉然剛直少容見有作偽者則顰蹙曰彼胡為耶人有過正色面言無所諱言已即不復記存人知其無他亦不之憾中歲家指衆多生事消落乃稍近醇醪以釋胸

中醜磊酒酣慷慨悲歌輒舉前史興替乘除之迹以自廣纒纒無少遺聽者為之灑然撫育公輩恩義懇切又時時面命之曰吾先世以淳厚朴素承於家絕無浮靡偽飾予耳目所覩記則曾祖壽近百年予祖及父率踰七望八是豈易易致哉予日孜孜懼弗克紹前休若等其毋逐時態而忘先烈也噫有味哉府君之言乎嘗輸粟邊庭得授七品散官云配孔氏處士瓚女宣聖裔也抑畏溫恭出自天植勞瘁拮据相肇

厥基嗣後見府君念家之瘠也愈勵勤約彌塞隙漏俾無內顧憂故如賓之敬終身不衰乃嘉靖丁巳八月初九日先卒距生成化丁未十二月十九日得年七十一子一諱濯嘉靖戊午夏卒娶張氏儀賓琮女生女一適今山東徐憲副節蒙 恩封宜人繼亦張氏廩生文玉女生女四一適聽選官吳宰一適郡庠生高揚暉一適宋時儒一適王廷極竟無子伯兄之歿也府君悲悼殊甚既而曰命也夫吾其安之耳時公方

心修堂集 卷六 五
視學中州馳書言狀。公哀痛不能讀。及公歸自西川。府君懼迎於閭。曰：汝至矣。吾今復奚憂。公竊識視之。步履健捷。飲食如少壯時。日惟怡然。靜處不聞嗟嘆聲。且不以死為諱。曩公夙為備。終具聞之。欣欣然。私念明達靜適。若斯期。願必可踰也。迺隆慶己巳秋。患目昏。然無他苦。辛未冬。忽脾泄。不可藥。至壬申正月五日。終生成化。辛丑十月初九日。壽九十二。先二日。呼侍者曰：再越日。吾歸矣。及期果然。惟府君誠篤質直。機

械。伎害性。所未有。天錫穹齒。壽考令終。福善不爽矣。而伯兄淳謹孝友。直諒坦夷。未三十即蔬素。誦經。漸親。永命。乃生子不育。先府君而逝。年五十二耳。謂之何哉。往伯母卒。葬孟莊祖塋之次。卜茲二月十日。啟窆。奉府君合焉。泣而為之。銘曰：世降偽滋。靡靡致飾。孰為障之。府君是力。纖妄不存。光明正直。善匪近名。行求我得。豐約屢遷。無陂無側。大耄康寧。天祐罔忒。偕老有家。刑于維則。鬱鬱幽宮。全歸同即。於惟府君。允

性修堂集 卷六
三
矣潛德勒銘考祥後昆其式

勅封太孺人先母合葬墓誌銘

太孺人姓鄭氏考諱世威福之閩邑人世隱農田正德中先考編修府君自臨汾遊於閩適前母賀孺人卒乃配太孺人賀孺人者江西按察副使東園公女也先君棄代子公甫十齡家事漸凋落太孺人艱貞自誓拮据以力於衣食擇良師遣子從之遊每日汝父未亡之數月酒酣輒慷慨悲歌憤不自勝曰吾以家累而罷學未

始一日釋於懷也汝其督兒于成俾以畢吾志乎始深訝其言孰知其為訣辭哉汝其識之公旦暮或少懈即涕泣不食曰小子而忘汝父之言耶日諭月省冀承考意閱十年公幸舉于鄉又十年餘始成制科入史館迎養都邸得日食大官時諭公曰汝家故貧賤吾處之素矣母慕紛華而忘勤約也壬子秋公奏三載績蒙天子推恩贈先君翰林院編修文林郎母得封如今號公奉制書歸母涕泣盈襟曰汝父

積行累功未食其報 皇恩有赫汝父之貽也
其母忘所自哉公祇製翟冠錦服以為壽太孺
人一再御即函之歲時慶會服飾如故時公屢
以命服言則曰翟錦輝煌吾非不知華頻服之
得毋近炫乎且汝父安在吾忍獨享其榮耶丙
辰夏公視學入梁每出試諸生太孺人必誡曰
諸士黜陟繫汝茲行夫陟者榮一鄉黜則一鄉
棄之矣陟固宜慎黜其可易耶甲子夏公以夙
釁構讒歸自西川方懼無辭以白也太孺人言

笑自若曰汝疎慵迂執不曲適人情不求知當
世吾嘗虞汝賈禍深也賴天子聖明得放歸
田里幸莫大矣他又奚念哉公竊識視太孺人
神完氣定耳目聰明步履康強食飲如壯者方
自慶得娛侍於期頤也乃丙寅正月十日漏下
十刻矣周行視孫曾依依不欲寢既入臥內命
侍者治櫛沐櫛畢苦頭眩頃即口眼閉喉中時
忽忽作聲諸醫環視百方無所濟蒼黃叫呼遽
罹大罰蒼天蒼天有如是耶病之第六日也嗚

呼痛哉太孺人敦樸純誠解書知大義生平不
能為一誑辭絕口不談人得失一畝之室竟日
不聞笑語聲與妯娌居厚讓無所爭油油然不
隨不激終身無或怨嫌周睦姻鄰禮愛有恒雖
人涉微弱未嘗有怠容撫賀孺人所遺子思中
備極恩義命公為輸粟得七品散官云年雖漸
高值歲時享祀籩豆必躬修語諸婦曰吾不逮
事舅姑惟此用誠耳賓至必自理庖饌諸婦或
踈踏不自安則曰此主母責也豈以老而怠耶

御家衆尤軫念其寒饑一或未食箸不忍下媵
婢有所適者或以不足言即簪珥衣物無所吝
故卒之日自族姻以至戚獲哭往往過哀問之
皆曰太孺人於我有德而各有述焉夫太孺人
於吾宗躬勤履約振世保孤其德備矣顧養不
少待痛何如哉痛何如哉語曰種木成林未息
其陰天乎神乎其忍是乎太孺人生弘治戊午
八月三日壽止六十有九悲夫思中娶劉氏繼
柴氏公娶盧氏繼田氏蒙恩獲贈封皆孺人

孫男六長孟禎幼失母太孺人育成之為諸生有俊聲癸亥秋以寒疾卒太孺人悲慟幾不能生禎娶王氏引禮志繩女次孟禧邑學生娶宋氏舉人國卿女孟祺娶郝氏指揮尚賢女孟禔聘張氏國學生崙女孟禴聘楊氏進士沐女也一尚幼聘李氏女八一適胡從唐一適刁桂一適邑學生劉應春一許聘李喬蕃國學生光淳子餘許聘崔巍趙希儒張一正一幼曾孫男一以恒女一早夭葬以卒之年三月二十九日啟

先君之窀合焉從卜期也時日既迫公泣血而志之顧悲痛無文不能彷彿先德若溢美以厚誣則非所敢也銘曰 於惟我祖始卜孟莊川原煦煦風氣允臧先公茲從歲月遂長吁嗟太君胡遽祔藏太君天錫柔嘉維則苦節立孤先公齊德發祥肇祉燕翼后昆 帝原所自 綸綍覃 恩媿子迂庸未能建立苟曰才賢何慶不集有鬱佳城體魄寧止揭石書銘用告來祀 長男邑學生亢懋符墓誌銘

慎修堂集 卷六 三十一
嗚呼禎兒何以遽至是耶往歲其母盧孺人亡
予嘗銘之矣嗚呼痛心今又何忍銘吾禎耶初
嘉靖乙未秋盧孺人來歸閱三歲再孕不育已
亥生子章未幾殂于痘予母太孺人深念之庚
子秋予晝寢齋中感奇夢頃之兒生七月二十
八日也乃名曰孟禎太孺人以得之艱也朝夕
拊視惟恐其或痛疴惟恐其或失墜壬寅秋盧
孺人卒癸卯田孺人來繼其所以撫愛禎者周
悉備至禎依依係戀自幼迄終若不知其非所

出也五歲即喜作字予口授以古詩六歲授
以論孟不數過輒成誦丁未予舉進士取至都
亭躬督課之壬子夏為舉業文即時有奇語癸
丑春延鄒生一麟授以易鄒拜官延何生炯林
生庭彬繼之丙辰春予出視梁學過里舍禎生
十有七年矣迺為納婦王氏明年學憲紀山曹
公錄為邑庠弟子員戊午曹公再試益奇之寘
優等食廩祿秋試下第歸大梁痛憤不自持予
時時慰止乃愈奮于學所造日益邃庚申試于

學憲仲石宋公侍御容堂吳公二公特稱賞皆以其文冠諸生吳公仍拔置河東書院躬親指授至刻其文示式焉辛酉秋試再不第痛憤甚眠食為損予時長憲關中貽書諭之意乃解壬戌春女淑生其夏郡守九川江公課諸生仍以禎文為冠夏末從入東藩予簡齊士之秀者與為會率五日一課文禎復以其間取題之未課者自為文經書皆成帙仍讀書執業不廢蚤夜癸亥仲夏子以恒生生之次日予遷左使莅西

川孟秋携之抵里中踰月偶感寒臥病五六日溘然長逝八月二十二日也僅二十四歲耳嗚呼痛哉禎生質甚穎八歲時得予同年字號錄玩閱不旬日凡姓名邑號漫叩之無一謬者通史業精事必究其始末不為涉獵計為文會理措詞纖息備具連累統貫指趣沛然事太孺人及予及田孺人孝敬曲盡下氣婉容未嘗少忤撫愛諸弟怡怡愉愉真如手足然出而禮長和衆察言觀色油油然惟恐傷之試雖屢優務自

韜晦布衣徒步慎口如愚御臧獲亦寬裕有恩
禮終身無忿色無飾詞故歿之日內外遠邇莫
不痛惜悲惋焉往予守官史局三載考績

天子推恩先君贈編修母封太孺人二孺人並
獲 恩命禎時年十三津津色喜迎賀予曰吾
祖吾母今日不亡矣每時賢聚集輒從後竊聽
其言議而上下其人時以告予類無所爽予師
宮保雙江聶先生異其資字之曰興甫示所期
也後從應生詩遊避其字乃更曰懋符云禎幼

多疾十四時病眩藥之吐痰升餘自是體漸豐
家人以為慶然相者每曰豐厚宜遲星者則曰
日干宜盛予聞深惡之以為妄且意禎孝友之
行足以履祥寧靜之質足以致遠仁慈抑畏誠
恪寬和皆永年器度也詎意其短折若此竟中
小數之言哉子生方四月女方再歲日呱呱而
啼予奚能為懷耶仲子孟禧等卜茲九月二十
七日葬禎于孟庄祖塋之次泣以銘請予噫子
奚忍銘吾禎耶痛楚薰心言無倫次蓋不啻一

字一淚已矣銘曰吁嗟昊天成之胡艱摧之
胡亟賦之質胡奇畀之年胡嗇豈遭值之偶然
抑至理之難測嗟嗟爾禎爾學淵邃爾行溫淳
懿善克備未食報于爾身惟天福善尚俾于爾
後之人

慎修堂集卷之十八

慎修堂集卷之十九

河汾亢思謙子益著

傳

勅贈兵部郎中北原劉公傳

劉公諱朝用字汝賢北原者學士大夫即所居
稱之也世為關內高陵人姓著邑中高祖義曾
祖能皆有隱操祖昇仕河南沔池遞運使父鏜
以厚德聞公甫成童沔池公携之官俾從里塾
師授四子諸篇不數過即成誦識大意一時學

者未能或先也稍長博涉經史傳集旁及稗虞
伎術百家之言靡不綜述迺父母春秋高晨夕
為就養圖遂棄去服勞隴畝樹藝甚時不少遐
逸獲入恒有秋父母訢訢如也父疾躬親藥膳
承侍致養不出閭里及終痛擗悲號目因以病
事母仍以孝稱行役咸陽聞母病中夜馳歸足
重繭不覺也母久未平屢祈 **嶽**延誦科儀願
以身代母疾竟瘳及壽終哀毀如喪父時目遂
失明叔子世昌垂髫即俊穎超恒日能誦記數

千言公口授書傳欲迪有方及就外傳每夜歸
靜對耳提督課無倦叔子讀易至積善成名則
曰汝不積善欲成名得乎讀史至買臣傳則曰
買臣未達欲不負薪得乎讀孟子至舜發畝畝
章則曰古人皆自困而亨况末學耶義方規飭
隨觸而見類若此叔子連舉丙辰進士授巴郡
司刑便途省覲以俸易幣獻于公公峻拒之曰
汝以是為足華吾躬耶汝能貽吾令名即華踰
文繡矣矧一幣直數金汝始階榮進可遽違素

履耶迎居官邸日惟杜門危坐不妄接一人恒
孜孜語叔子曰黎元之命懸于理官與其深文
勅法以賈聲華毋寧晦明疎網以惠蒙昧耶叔
子遵其訓蜀人戴焉公尋卒于巳年六十二配
安人李氏有賢行初佐公持內政拮据惕厲家
用以克公居父母喪族姻欲公稍從俗尚安人
曰孝宜循禮舉必隨家延緇黃侈觀美豈所以
為訓耶劉公曰是固吾夙心也黜華崇質據禮
致情里閭迄今以為則安人從叔子居太原每

聞刑人聲輒愀然曰而忘而父之語耶叔子祥
刑績最 天子徵為兵科給事中懷誠奮往條
刺屢陳衆咸為之危安人曰茲而職宜然毋庸
他恤也及下 詔獄竄炎荒叔子以侍養違遠
悲慕不敢言安人怡然曰而父期而以令名茲
殆庶幾乎行矣勉之毋以我為念而父之期未
止此也里有惡少使酒恣橫于門僮僕欲為應
安人捷關不聽出明日召至從容詰其由惡少
愧悟易行焉嘗捐金恤宗人之困推食周鄰婦

之饑蓋得於劉公之化者尚多也叔子謫二年
再遷留都司馬郎值天子覃恩劉公得贈如
子官母封太安人尋晉守青州迎安人就祿卒
于青年七十五子五人世榮世華次即叔子青
州也李世遠世寧孫四人叔子甫免喪銓卿特
薦起補平陽廉潔光明忠誠敏達真古循良復
見矣君子以為有所本云 贊曰成周以鄉三
物賓賢能而六行之孝先焉漢策賢良文學士
矣而孝弟力田之科特崇其秩故周漢才俊之

盛萬世稱之者不衰近代得人必歸科目外無
他岐敦行務本之士椎魯少文不自表見率沉
淪草野焉終謂非求之未盡其方耶若劉公者
竭力耕田親心怡順終身悲慕遂以喪明雖周
漢所舉奚以加焉使得有所試則其風猷鼓動
必有蹕絕乎時者顧隱處不任教僅行于家化
僅及于里君子不能無惜焉然公有子登制舉
值盛時司刑而明慎不寃司諫而直聲震溢
剖符齊晉而政平訟理民愛戴若神君焉謂非

公之教耶行且秉樞筦鑰明德普施矣公之教
不由茲大顯哉噫公足以慰矣

劉節婦傳

節婦姓王氏汝南上蔡人父某歲貢入國學未
仕卒母周氏某省憲副改菴先生汝勤女兄也
周夫人聰哲絕人通經史大義動靜有則節婦
少漸禮訓閑於矩儀年十九適邑人處士劉君
守志二姓皆衣纓舊族劉君敦朴力田刻厲自
樹迺嬰疾甚恐不起時子汝觀生甫五齡撫之

謂節婦曰天數倏遭不能視幼子成立矣而育
而訓寔惟汝勞顧俯仰無資汝其若之何節婦
曰吾惟填溝壑以從君耳他尚奚恤哉劉君曰
是豈吾所期忍令孤嗣無依耶節婦雨泣不能
言夫卒髮跣號痛心不圖存常為身殉計周夫
人與同臥起跬步不違時時指幼子諭之曰劉
氏如綫之緒惟在此兒汝族鮮菴功家無姊妹
吾齒髮非壯恩勤顧復將疇焉依詎忍忘若夫
垂盡之言不為宗祀計耶言至再三節婦乃幡

然悟曰誠然哉微吾則兒將罔克資以生與其
從夫君之歿毋寧植夫君之遺乎於是忍情飲
泣斷髮毀容與母氏相依以居楫閑靜處防遠
嫌疑雖至親不踰閫見也日理絲絮為布帛間
治女紅易菽麥以資養生艱貞孤苦人視之不
能堪而節婦安之子成童即檢先世遺書俾從
名師學暮歸必稽晝所業章程既即燃膏令誦
習身績繼以臨之汝觀未弱冠藝殖茂異砥行
履方嘉靖戊午余校士莅汝南得一卷然有

輝心甚奇之遂錄冠諸生比啟封則汝觀也時
令長博士交陳節婦孤貞善教狀余嘉慕高行
嘆賞不能已然以年未及制也屬師帥禮異焉
歲丙寅節婦踰五十矣父老諸生列其事於學
憲達先生先生迺顯異其門檄郡邑為表奏節
婦曰未亡人宜然耳何足以聞力辭不願越
明年汝觀舉進士試政銓曹念母德不可終隱
也遂具疏上於朝天子下禮官禮官下郡
國按覈無間言詔錫褒表樹闕衢途皇恩

蔚赫一邑以為榮節婦曰實非鄙人庶幾所望也
也已已冬進士授司理太原躬迎節婦就養官
邸每語司理曰元元之命繫於主刑詞貴明徵
罪宜審慎探情露訊非所以禁邪暴而育羣生
也司理議獄致刑周歷并冀忠愛哀敬明啟簡
孚法平民服聲實冠一時部使者屢以祥刑嘉
績薦上公車與司理遊者咸修詞以賀謂節婦
慈訓足徵也節婦歛然曰未亡人奚有哉母亦
庶幾克對夫君及吾母之遺訓然耶君子愈賢
之處士歿時節婦年二十九今五十有九司理
名光國汝觀其字云 贊曰昔趙客議立孤與
死之難也曰立孤哉太史公曰非死者難也處
死者難有味哉其言之乎夫計重綱常則軀命
非所惜義烈憤激視死如歸噫是豈易易言哉
然斯須勇決即生平之大節卓然矣若夫盛年
守貞矢心銜恤迺資儲困乏微弱寡親救孑孤
燈躬拮据捋荼以自存立而能卒保遺孤屹有
樹建俾宗祀綿於雲仍休光延於邑里非金石

其心圭璋其質瀕九死而不渝者能底是哉視夫慷慨殺身殆未可同日論矣若劉節婦誠其人哉身被 寵旌子躋膺仕非天之所以右善人耶粵稽往昔賢母隆慈誨之能淑媛亮潔白之節各舉其一耳紀錄徽美皆照耀簡書良以人所未易能也節婦實兼之豈不尤難能哉是宜昭布來祀俾為婦為母者象而則焉

墓表

待贈君廩生對泉劉公墓表

公諱淮字必東姓劉氏曲沃西許人對泉先生者學士因所居稱之也五世祖敬禮為郡庠生有俊聲敬禮生亨亨生福福主鑑世以隱德聞是為公高祖曾祖祖也考璉邑庠生奮志墳典習與時乖授儒官終妣薛氏生子二公其長也幼即穎慧聰悟志踔功勤下帷誦讀謝遠紛華弱冠入膠序為弟子員嘉靖丙申岱麓王先生試公文亟稱賞不容口拔居選首食廩餼復携入河汾書院躬指授之嗣是詞藝日新聲華籍

甚每典學使者校諸生公必列高等廼七試有
司竟無所遇時人皆為公數奇嘆公曰為之自
我者非也數何尤修業弗少怠同母弟漢亦為
邑庠生公啟導懇切蔚有令聞繼母張育子三
公撫恤周至俾各有所營人不知其母之異也
用能得張之懽心伯子朴甫解事即躬授章句
日勤訓誨總非亦補弟子員公謂之曰自余先
世迄於今講詩書之澤並英俊之遊蓋六七作
矣門庭承授學藝研精力非不專也而未有能

奮漸鴻之翼章稽古之榮者謂非命也今汝復
得預茲遊厚幸矣可弗圖所以自振拔用光顯
於前聞乎夫器博者用斯大往勇者造必深蓋
志士仁人所為根心而俟後者也小子毋忘哉
伯子詞藻議論已卓然不羣而期承公志也益
探索往籍至日之蚤暮或忘歲辛酉中式鄉闈
人咸為公賀公曰未也士所當為止此耶戊辰
伯子舉進士驛書至公欣然曰是廼克成吾未
竟之志闡先人世澤之遺矣進士授令壽光便

道欲奉公就養宦舍公以繼母春秋高弗忍違
遂不行語進士曰夫吏之近民莫如今民之情
謂視已異耶察施已之願廣及物之施一夫得
情千室鳴絃矣肆威以刻下近利以肥家吾深
不欲聞有此也進士奉若訓詞顧謾匪懈羔羊
素絲之頌洋溢東藩監司表薦異政于朝凡
幾上矣辛未春上計還自都再遣力迎公時繼
母終大事襄公廼從子志入壽光敕屬門內謹
肅無與比暇則溫習舊業若子未第然者進士

君晨夕造寢候安否躬具旨甘侍食飲及暮公
必詢晝之立政宜民者若何居無幾命駕欲歸
進士跪伏固留公曰自吾之至也汝日屢入而
屢吾省將無隳廼公事乎且吾所為悅者在是
耶一乃心堅乃節樹偉績揚令名吾雖隔千里
悅於面談矣勉之哉進士君隨送再舍揮涕而
歸公行歷懷衛踰太行抵澤郡旅舍忽以痰疾
卒距家僅三宿耳隆慶辛未九月五日也距生
弘治乙丑八月五日得壽六十有七然明年即

正貢而不待悲夫配常氏生子四長即進士君
娶王氏繼衛氏次格娶賈氏柄娶楊氏枰娶許
氏女四楊得佑李櫛王三聘王三重壻也孫男
四養心養性俱先卒繼業繼善尚幼孫女三俱
幼公純誠和易篤厚人倫著族譜以聯支屬定
鄉約以睦比鄰尊禮師儒慎擇交友故凡與之
遊者薰其德而愛慕之櫬歸自途無問識否率
悲慟會迎若其所親是可以徵公之素矣哀訃
東聞進士君驚惻幾隕旋即號泣西奔卜以壬

申十一月十一日葬公于村北之新原先期謀
伐石樹表迺徒跣踵門手狀徵詞於余余弟思
禮與進士君同舉于鄉雅知公潛德之美是用
表其大者焉嗚呼公學求自得而科目竟違貢
已屆期而須斯弗俟誠命之為矣然有子象賢
巍科蚤掇廉平豎績膺仕指期食報于後昆謂
與身親異耶矧 天庥方至 馳贈非遙 綸
綍褒嘉又真及其身乎 皇恩有赫作德用章
東西行過是者尚式旃哉

行狀

處士李公孺人郭氏行狀

李公諱鳳良字某世為太原榆次人曾祖景賢祖志遠父文玘率隱于農以淳朴稱里中文玘娶趙氏生子四季則公父母以幼子特鍾愛公孝誠性植復得父母心質直寡言笑躬勤稼穡日與老農量晴雨課桑麻經歲不一再入城市見胥徒引避不交談足跡不踐吏治所繇賦率先輸不俟期會初諸兄子姓既繁父母令分異

公叩頭爭不得乃治田益力數年業大振諸兄改服賈于遠公獨與父母居晨夕走堂下上食父母忘其異也非客至不肉食一布裘服數年如新製治父母喪則整整具備然悉自出已貲事諸兄恭遜周至諸兄出則為持門戶歿為撫其孤底成立孤亦父事之終身與人交無一妄語鄉鄰有爭輒就之平不數語率犁然當其心配郭氏相對如賓竟未嘗有反目態子琦生甫解事即訓誨省督少有過必詬責改乃已居常

無惰容時獨立于庭子姪無敢輕出入者孫敏
生閱月聞啼聲喜曰大吾門者若耶必早令務
學以成之又顧琦曰子孫必以學而成然非先
世累善以基之未有能興者也汝其識焉迺正
德壬申十一月某日卒距生成化某年月日年
僅四十 耳郭孺人者邑處士曇女五歲喪母
哀毀如成人愛敬繼母不異所生十八歸李公
即能養舅姑姑每曰吾甚樂與新婦居也家鮮
僕婢身操井臼暇則事機杼刀尺無停晷妯娒

族姻來省舅姑必具精美饌俾厭飫乃歸李公
歿獨拮据家室勞苦倍往時每泣語琦曰爾幸
無忝先人也孫敏成童即令就外傳每雞鳴必
令起誦讀夜燃燈績紵以臨之敏既長力學忘
寢食復止之曰毋勞過而疾生也日恒皇皇然
若不自安及敏薦于鄉乃稍怡逸敏登進士捷
聞始大喜曰夫君之言今果然矣吾可以見夫
君於地下矣敏簡讀 中秘歷踐諫垣數使往
迎每曰努力聖明汝父能吾養也平生食取充

口罕茹葷然少不潔寧不食衣無華靡亦未見
有點污痕素強健寡疾病嘉靖甲寅八月二十
四日語家人曰吾逝矣吾逝矣明日端坐而歿
生以成化己丑閏二月二十八日壽八十六子
一琦 勅封刑科給事中娶趙氏 封太孺人
女一適郭堯學孫男二長即敏今刑科都給事
中配王氏封孺人次聰散官配白氏女二溫思
明鄭忠壻也曾孫男四之春娶朱之陽娶孫光
祿丞允中女繼姬保定判輔女皆邑學生之夏

聘張女五一許寇一鶴國學生陔子一許朱光
祖吏科給事中繪子一許順天寇通判陟子一
許董國學 子一尚幼封君卜丙辰二月二十
七日合葬于南岡新阡公與都諫舉進士為同
年讀秘書為同館相得甚驩獲聞世德詳且久
也爰次其大立言君子庶採擇焉

西河恭定王妃楊氏行狀

妃姓楊氏西河恭定王配也父節母祁氏楊為
襄陵世族門舊植雙槐弘治中羣鵲忽巢其上

晨夕鳴噪喧呼識者異之時邑人都運邢公方為兵部郎夢黃白雲擁女童自天而下于節家廼弘治丙辰正月十九日妃誕生邢公適以省謁歸里謂節曰君女貴出恒格予夢兆之矣妃稍長即以令德稱恭定王初配馬妃卒無子廼具疏以選繼請于朝制可之時恭定母葉太夫人憂未育孫方慎簡求以廣嗣續然未有中選者占諸神得利西南語乃于襄求焉妃以名家子有譽聞且貴徵種種太夫人深奇之選

乃定遂以封號疏聞毅皇帝命重臣持節捧冊錫繼妃位父節得封東城兵馬副指揮妣封孺人鵲巢之慶信天定矣其來歸也葉太夫人性嚴重恭定日問寢視膳惕惕恐違親旨妃躬調滌灑俯首側侍視姑顏色為欣戚廼事事當太夫人意懽其心恭定以妃能得太夫人之懽也於是舉內政悉屬妃妃又事事當恭定意懽其心嘉靖甲申晉端王庶恭定純孝錄實舉奏肅皇帝下璽書褒表世以為榮寔妃相

之也今王初生恭定以育嗣艱鍾愛特甚妃曰
是非所以成子也甫童年即節以禮導以義端
其師保慎其交遊制其出入與居舉有恒度今
王又率履而不越悅禮而敦文至于晨昏省候
左右躬勞以承恭定及妃之懽者猶恭定及妃
之事葉太夫人也嘉靖癸丑今 晉王以王世
德作求孝愛誠篤復錄 上其事 肅皇帝再
錫龍章命儀曹禮異寵嘉洊被于昔有光寔妃
訓之也妃少出溫裕長極貴富然日兢兢懼或

侈驕歲時廟享必潔且虔蠶桑織紵必躬且慎
待姻鄙睦而有恩御妾侍肅而不過雖詩傳所
載古昔賢妃謂視今異耶歲丙寅妃壽七十今
王圖所以稱觴上壽之儀心力畢致縉紳學士
發為聲詩頌述者盈積几筥至其日妃坐殿上
王拜賀於前諸孫曾羅拜於後若金英玉樹者
十餘人退而王妃帥諸將軍夫人及諸女孫曾
拜跪祝賀其麗相若族姻觀者遠邇聞者罔不
嘖嘖稱賞美妃福履之盛王孝思之純焉越明

年妃患痿王惶懼涕泣延醫慎藥走祈露禱周
於神祇妃忽夢瑶珮仙姬來撫視語諄諄然翼
日乃漸瘳隆慶壬申疾再作十二月初九日薨
得壽七十六云生子一即今王名表相別號玉
峰先娶王氏封夫人早卒繼王氏生員王騰女
封王妃孫男五知燧封王長子聘張氏廩生朝
政女知饒配劉氏散官學詩女知黈配周氏典
寶官女知焯聘高氏生員尚漸女知杰幼孫皆
封鎮國將軍配皆封夫人孫女三隆化縣主渠

江縣主武陵縣主儀賓侯炳李薰師鯉壻也皆
封亞中大夫曾孫男六饒出者新壘新塋新坯
新塹皆封輔國將軍黈出者二尚幼曾孫女三
亮寨郡君適儀賓張邦治碭山郡君許李承恩
一幼恭定之薨 勅葬于雙河之原及是如
制遣官致祭 勅所司開恭定壙合馬萬曆元
年五月十一日也妃初薨今王哀擗悲號見者
心惻再閱月縗經手行實踵門屬公狀之公自
舉鄉試即被知遇于 先王嗣辱 今王道義

之雅習聞妃懿行非一朝夕矣媿寡昧不文無能少有發明惟立言君子裁焉

慎修堂集卷之十九

慎修堂集卷之二十

河汾克思謙子益著

祭文

祭岳武穆王文

昔宋祚式微翠華北狩惟王精忠智勇天授義旅奮揚顛踣恢復指期權邪讒構業廢垂成民嗟遺孑志決身殲賢愚悲咽惟此郾城膚公昔揭勝筭丹衷于今為烈廟貌聿興式懷報德祗潔尊牢英靈來即

祭上蔡謝先生文

嗟孔孟之既沒慨斯道之久湮幸二程之崛起
得千聖之統真時惟先生授受獨親升堂覩奧
造詣溫純發伊洛之秘溯洙泗之濱力去矜而
入德闡聖學於維新卓彼先覺風我後人公課
司文教課試時巡途遵祠左祇薦明禋尚祈默
相俗化風醇

祭忠烈許公文

嗚呼君臣之義等於天地烈士仁人舍生取義

公見既明公操愈勵罵賊奮身致命遂志萬古
綱常一身獨寄生也不虛死兮不貳勁節精忠
後先鮮二 聖代育材義盡仁至報 國如公
庶幾無愧公束髮知名仰懷寤寐課士天中新
祠祇企遺像拜瞻如臨往事式薦生芻毋我遐
棄

祭漢舞陽侯文

惟神奮身豐沛翊戴高皇純忠偉績躔絕輝煌
自霍定代功溢冀方欽茲遺澤廟祀莫忘季春

既望享獻有常佳辰每值風雨時颺今春少旱
苗麥就黃民方致禱神即降康霖霖膏雨四野
溥將甫田或或錫福穰穰旻倪士女懽悅無疆
受神之惠愈久愈長敬修報禮黍稷馨香雲車
風馬駕自帝鄉

祭少師虞坡楊襄毅公文

維公挺生降神河嶽惇大端方允矣先覺弱冠
制科英聲昭躔摩撫疲人為魯為卓公去愈久
民滋味歌其咏維何遺愛孔多廩廩禮讓永世

不磨擢贊邦政秉德匪他十年郎署丕奮訐謨
巡行萬里期滅封章上逮天子曰都惟
昔文武二柄同途汝憲齊魯以育譽髦道術經
義惟堅惟高有德有造濟濟人豪河湟弗靖賢
哲獨勞臨戎仗鉞我武惟揚師虞經畧既有典
常棊布屬國遠徙氏堯內夏屹立鉅防力
摧逆帥屢蹈傾危奮然國計奚恤家為帝心
簡在爰立台司兵樞艱大曰惟汝宜腹心手足
百世一時韜鈴禮樂用對土知獫狁匪茹連

結姦宄竊伺城垣虔劉赤子 詔奪公情俾戢
 邊鄙拜命不遑宵征几几公在師中威名愈熾
 壁壘改觀旌旗易視 潜奔五兵不試惟
 帝念功錫命三至赫赫本兵虛席以遲塞塵既
 清賜環正位 帝勤吏治簡陟阿衡甄別流品
 允公允明若彼哲匠巨室是營榘楠梓杞梁棟
 榦楨密勿入告莫匪周行寔隆鴻業遽結鷗盟
 義方訓誨詰嗣于成謝蘭竇桂競秀同榮惟是
 伯仲並擢魁名叔兮試武首舉蜚聲勛庸門閥

海寓莫京胥登華秩奔走王程舉還膝下侍色
 終身非公景福疇克是臻惟公樂易觀若飲醇
 惟公勁直峙若嶙峋公之顯融贊揚 聖真公
 之來歸佑啟後塵衆期勿藥鼎鉉再光民生無
 祿倏迄帝鄉貫古之識命代之英胡不少延曷
 其能忘公鑑知夙被大國于宣範模伊邇期以
 周旋在公夙夜莫即几筵絮醅馳奠涕泣如漣
 祭太子太保紫巖劉文安公文
 繫公挺生孕靈河嶽神解性成日嚴追琢濟發

洪源並驅先覺鵠舉鸞翔瑜懷瑾握賓興總非
嗣美魁名茂揚大對鼎甲臚聲抽書石室載
筆承明舒華雅什金石鏗鉤逆豎簸張出貳
郎屬夙夜在公憂勤檢束天宇廓清賜環史
局晉秩青宮爰資啟沃四司明試賢雋彙升敷
求吉士師席特膺勞來匡直規矩準繩譽髦咸
造有翼有憑飛龍御天簡在左右講幄弘開
三接晉晝忠赤自盟雍容敷奏嘉猷嘉謀期格
我后孚尹上達天聽昭垂錫予蕃庶寵擢

匪夷秩宗典禮作朕夷夔太宰經治南國表儀
甄別品流惟明惟允詔筦戎機赫赫留尹禮
樂詩書訓式戈盾茂烈訏謨于今為準帝求
良弼召我舊臣遺榮鑒足抗疏乞身冥鴻高舉
晦跡恂恂今名雅致海寓完人子奮孫騫遐齡
景福天不憖遺中台倏伏節惠賁終皇儀郁
郁寵異儒英論思在夙公鑿坡厠跡曰有後先
典刑匪遠寤寐周旋哲人殄瘁悽惻同然綴詞
寄奠寫此誠虔

慎修堂集 卷三 五
祭太宰西磐張恭肅公文

吁嗟我公孕靈河嶽弘大溫恭寔惟先覺蚤冠
譽髦蜚聲峻倬筮令山城風還淳朴十年瑣闥
謹議諄諄薊門西夏仗鉞經綸勛猷震疊邊鄙
清塵輝煌 袞錫自楓宸丕績載揚入司臺憲
夙夜在公罔渝尺寸直道興讒潔身嘉遁一紀
明農恬無外願 帝懷耆舊起詰戎兵 國儲
司計爰正冬卿緩急劑量不震不驚百工信度
宿蠹載清留都考核正是庶職 特昇宰衡往

典黜陟惟公惟明允矣司直閱歲南曹迄今垂
式 帝眷方殷簡在左右抗疏來歸聿全去就
逸豫康寧方期遐壽胡不勗遺百身奚購惟公
飭躬性成清約八座踐更寒士如昨惟公立
朝頻歷變故一德自持罔移其素齊眉伉儷白
首與偕有膺孫子蘭桂盈階望茲九秩綽綽令
終兼膺景福海寓疇同公叨塵鄉誼夙籍典刑
緬懷往昔共被德馨哲人倏萎曷已涕零陳詞
寄奠期格冥冥

祭吏部文選郎中王湛泉文

嗚呼王公胡迺若是止耶夫其剛大之氣直亮
之節孝友之行康濟之才寓內傳公者指未易
多屈也胡厥施未竟而迺遽止是耶惟公弱冠
成名司理南服祥刑令聞洋溢三吳及簡屬天
曹主持銓選也甄別才賢升沉淑慝獎靜退而
進孤寒抑競躁而摧奧援一時士習遂駸駸然
向風矣抗危言觸權宰 天子為之動容百寮
因而生色於斯時也直氣震疊於八荒風采想

聞於萬國邦治清頽風息而公之釁孽亦孔棘
矣解組來歸丘園自樂遐覽靜觀聿求先覺誠
鴻奮雲達蟬蛻污濁矣然蒿目時艱怵心民瘼
未始不若痼瘵在躬執熱願濯非果哉於遼邈
也泰運開新茅茹斯拔天下方喁喁然冀公身
以時升道隨時達也而天不憇遺本實先撥噫
豈命數之適然抑生民之無祿耶河山靈秀孕
賢幾何得一二如公復苦於取數之不多噫嘻
志雖齋抑而未畢名固與天壤而不磨吾徒幸

投閒於林壑方期與公修先王之訓以作乎鄉
鄰天胡此時奪我依仁追惟聚樂往迹遽湮臨
榻笑語詎意茲辰生平交誼骨肉相親討論夾
輔披豁天真奈何永別祇隔數晨沉珠韞玉欲
見奚因顧瞻總帳曷已悲辛籩豆孔潔牢醴式
陳臨風哀慟庶幾有神

祭贈君劉公文

節推省吾尊人

嘉遁丘樊葆真林谷謹恪居身惇夷範俗履坦
守貞徽猷卓犖義問昭宣流輝河朔德厚慶長

惠迪逢吉喆嗣發祥蜚英茂實射策

彤墀用

賓 王室司理冀方惟欽惟恤明慎不留有孚
惠德若鑑若衡庶司是式薦剡交揚公車生色
徵詔即期為邦司直揆本溯原義方有力擬
覩 馳封公如子職胡不少延仙遊迺亟哀訃
遠馳輿情悽惻惟公考終亦既踰六子奮天衢
即筮華軸 紫喆龍章行賁泉域繁祉咸宜四
顧疇克惟我邦君時懷岵陟擗踊涕洟茲奔鄉
國公厠部人眷知夙辱敬致一觴冀鑒情曲

祭蹇夫人許氏文

名哲嗣興天作佳配承休華胄詩書訓誨婉婉
聽從作式壺內齊美同芳好逑俊乂弱冠英聲
奉常高第試宰中都溫恭愷悌移劇大梁艱貞
愈勵惠愛覃敷內則允濟廩廩德讓上逮宸聰
帝旌循吏簡直南宮經綸王制揚摧國風寅
清夙夜敬代天工禮明樂備茂實昭宣皇
言敷錫表我臣賢褒及夫人女德莫先鸞回鳳
詒燦爛雲烟春曹陟外司憲東藩昭我紀度鵬

鶚高騫夫人克相澤物洗冤榷關飭從水蘖饗
殮惟昔秉禮抗議不回含沙俟射晉如而摧典
州倅郡淹抑遭徊居榮稱約處困匪隕幻化伎
倆等視浮埃氛霾消釋天宇弘開股肱名郡
帝命求才玉符載剖朱紱方來熊車入境竹馬
懽迎思見太翁棠樹敷榮布德施惠克類克明
農蠶盈野絃誦膠鬲凡厥庶民胥匡以生禮讓
有永遺愛愈光中饋無遂允矣贊襄四駱自皖
趨命徬徨王事靡盬就養不遑有懷二人道

阻且長魚軒言邁旨甘是將風雪凌厲迢邈川
梁庭闈聚順樂也洋洋盥饋佐餽婦順明章天
誠難堪未秋忽霜得正而畢胡悼胡傷夫人之
生冠裳鼎族夫人之歸世豸華轂夫人之伉行
司樞軸夫人之封流珠象服夫人之德孝謹端
淑夫人之鳳毛郁郁備美作程總是百福不
朽萬年奚永奚速公等奉土冀方郡公下屬徹
鄙發蒙恩深義篤祇奉化條胥奮胥勗窺公悼
衷羣情如燿遠莫致哀竊擬芻束千里馳忱尚

祈來矚

祭知縣封檢討王公文

座師稚川先生尊人

惟公瑞世大造降精清通中啟和豫外宏淵源
雋永家學是承遐稽丘索直究聖貞幽深蹟隱
旁燭惟明德完器邃邦國維楨露穎膠庠前修
避路卓彼空同特隆春遇廬阜蜚聲雲衢振步
筮仕山城克區盜聚義肅仁綏力敷王度教典
弘施頓開沉痾革心向化荒壤欣欣政成道洽
共仰神君江湖迹遠廊廟憂殷摠忠馳䟽擬徹

天聞立孤言激衆怒紛紜怡然解組隱矣焉文
嘯傲丘樊迤于初服遭際難謀安貞自淑真樂
融融鄙宗惇睦庭訓孔嚴義方式毅龍蟄存神
慶貽秀毓天定錫祥純嘏景福卓哉喆嗣寔我
宗師魏科夙掇詞苑荐居文章煥發奎壁昭垂
經綸弘負光大匪易敷宣 帝制謹恪沉思簡
嚴典重 綸綍攸宜畢力殫勞 帝嘉乃績推
本覃恩 龍章顯錫愛 國懷親師心交惕方
慶承軺懽承色覲詎意凶聞哲人寂寥謬列門

墻同此悲感吁嗟我公道積于身仕雖偃蹇素
履則伸發祥食報天眷方新綿祉垂裕廣博奚
垠公遐鄙對菲鯉庭桃李過荷栽培因知仰止
嗣復同迎興懷曷已千里一觴道遙心邇

祭先師蘇門高公文

嘉靖丁酉某月某日 先師蘇門高老先生以
荆南觀察使卒于官嗚呼哀哉神聽伊遠天弗
愆遺國傾宅俊士失羽儀百身莫贖多士同悲
寔惟道計豈曰私哀門人亢公時跽伏蓬茅側

聞驚絕位哭禮陳攀號莫及心喪義切執紼未
由辛亥歲孟秋廿六日始得祇詣中州展謁墓
下緬懷知遇之恩竊痛幽明之隔瞻拱木而淒
其履宿草而哀慕式陳絮酒爰發蕪詞其文曰
於維我師天民先覺毓秀孕靈降神河嶽睿哲
匪夷神解超卓束髮蜚聲清時鸞鷲龍飛射策
弱冠登朝志存匡濟迹擬夔繇揄揚盛烈周雅
虞韶金聲玉振駿發宣昭藝圃持衡詞場擢綵
學士宿儒傾心莫逮神宇永凝

襟川滙寓內

名流想聞風采歷歲銓曹門無私謁精白一心
權邪罔汨時宰黨同遂投簪笏嘉遯丘樊若終
林樾勸駕既屢幡然乃起恒德自持詎為時靡
羣陰交擠出叅晉鄙慈惠保釐西方多祉救荒
賑貸以植以生潛除巨盜不震不驚幽冤夢辨
政曰神明燭奸止水渠號嘉平敷惠撫摩修文
訓誘士仰嚴師民戴慈母歷考前聞莫之與偶
尸祝是宜與晉悠久。帝嘉迺績擢憲荆湖肅
肅王度明慎敬敷祥刑以格世有真儒方期大

作胡遽長徂天禍善人中道夭折良驥康莊方
馳而蹶珪璧明堂甫薦而缺膏沃徒屯人惻井
漑吁嗟我師飭躬峻潔寒素始終萬鍾不屑文
柄再司知人惟哲桃李陰濃並稱俊傑宣父傷
麟賈生賦鵬繫望徒殷蒼生無祿人亦有言不
朽惟三我師寔兼俯仰奚慙祚孔淑克濟厥
美玉樹金英凌霄可俟光同日燦聲與世存淵
促跖永亦奚足論予眇小子狂鄙顛蒙孱年初
試冰鑑躬逢力障羣議昭晰大公時監臨公禮
經也藩臬欲

以禮經為解首公曰當論
文不可論經羣議遂定

葑菲采拔叨冠河東

龍門幸際訓我周行離堂面命椽筆瑤章識非
粲類名以邕彰才漸機比譽自華揚感恩知己
夙昔稱難緬念深恩曷其可諉媿予蹭蹬屢困
春官局促無地玷我師門久躓而亨僅售一第
制試對颺復遭排泥期望云何顧茲所詣隆想
天人敢忘奮勵茲踵鄭鄉敬吊陳墓鬱鬱堂封
零零朝露孺子生芻橋公夙遇千載心期無由
仰籲國士感知哲人懷德淚徹重泉神憤衷盡

鍾期既遙小子何即多雞千里敷此胸臆

祭歐陽太夫人蕭氏文

嗟惟太君慈明天啟克相夫君含貞秉禮閨壺
雍穆賓祭允修孝敬勤約懿德咸周慶綿善積
篤生我師遠承聖道卓矣先知誠身格物妙契
機主盟斯世髦士依歸帝眷真儒兩師國
學因材曲成棟梁榘桷輔德青宮總裁史局中
秘範模南宮甄錄休命對揚克艱厥職推極由
然慈訓之力有赫龍章自天三錫鶴髮麗眉

聯翩珠翟輝煌

綸綍發揚德幽我觀今昔寔

罕其疇學繼真傳才猷佐聖有子若斯令終

得正矧在夫人獨全五福大耄長齡養承廩祿

善行性成坤道無忒強駛安康順化不惑有膺

孫子新沐國恩濟濟羣彥如璣如璠心勞肇

始躬覩其成天錫繁祉人仰令名公顓蒙弱質

叨廁師門竊聞懿範景慕恒存丹旒南指潞水

源源潔觴一奠曷盡心煩

祭門人太史溫以庸文


嗟嗟以庸胡迺遽至是耶夫其純粹之質古朴
之行寧靜之器經濟之學與夫冲雅之文予固
以君遠無不屆受無不宜也而竟若是已耶自
昔有言曰天必祐善人君衷無巧偽之萌身絕
非僻之累人過不談已勝不忌與之居閭閻然
而可親與之言汪汪然而莫可涖仁人善士世
君若者幾哉是宜君之履昌也掄魁甫擢奇禍
倏逢骨肉之慘今古罕同悠悠蒼天果何謂哉
激者曰天之害恒在善人予昔每病其為言之

隘也自今觀子無乃信然耶人之君子誠天之
小人耶不然胡有恒久之德而中道殂亡無鬼
責之行而荼酷匪常耶或狡或貪或險或肆迺
貴迺亨而康而壽惠逆無徵善惡匪常若是者
誠莫致而至一命之為耶嗚呼懷瑜握瑾世莫
我庸命之塞者誠然矣君讜言登對 渥澤即
承玉堂華貫鼎甲鴻名司命者不可謂無意於
君矣培植幾何摧折繼至生之胡艱喪之胡易
卿雲輪囷方煥而曠祥麟瑞時甫出而斃天其

慎修堂集
卷三
三
有意耶無意耶或者奪若躬而後有所畀耶或
者屈於此而別有所伸耶或者榮名壽考人不
可以無得耶或者生死修短天固不規規為人
庸心耶嗚呼弱嗣幼女孤苦徬徨萬里凶問垂
白在堂累累旅櫬道阻且長興言至此中心若
戕吾自君得道義心期努力千載茲甫及期既
致其愛祗極其悲長號一奠知乎不知

祭中丞王良齋公文 代作

粵稽海岱自夙鍾賢扶輿靈萃川岳氣全克生

夫子卓矣無前神穎駿發學殖靜專遜志儒林
周流丘索兼總百家直探奧蹟發藻舒華暉光
有赫譬彼驩騶天衢振策遂魁多士河朔蜚聲
荆璞三黜晦養心亨遭時邁跡大對 承明
端秉禮四牧于征令聞昭宣中臺掄陟正色危
言邦之司直歷按諸曹擿姦糾慝攬轡冀方羣
工敬式蠢茲  入于太原薄張殺伐褫鬼宵
奔匪惟功懋寔曰道尊簡司邦教範我薊門行
樹表儀政先化導藻鑑中懸準繩外蹈擊節發

蒙忠誠懇到愷悌弗渝小大成造晉佐廷尉天
下司平簡孚明慎寧曰寃氓雲蔚吏士饑告于
京僉謀食足屯牧是營 帝曰中丞汝其往理
剪棘披萊疆分畝履豪并革心耕耘喜起方輯
成功入報 天子睠懷故國歸俟 綸言歲月
曾幾遘茲凶屯宏猷未究遺烈具存 帝酌茂
績覃錫 鴻恩嗚呼先生令終奚怍雅識高標
寸尺謹恪大節隆名星虹昭卓緬仰範模九京
願作予儕小子夙荷陶甄周行惠我面命諄諄

德音在耳夙夜惟寅尚期矩矱龜勉終身哲人
云亡曷資軌則義切心喪情踰匍匐目泫衷摧
莫酬罔極千里緘詞寫此哀盡

祭僉憲楊舜原公文

繫公挺生孕靈河嶽剛大瓌奇展也先覺遐覽
丘墳詞華昭卓試宰邠西絃歌禮樂 帝眷循
良中臺峻陟獨抱風裁危言正色淮海澄清羣
僚矜式分臬兩川宣猷益力衆望方殷一丘自
足孝友刑家惇夷範俗族鄙改觀風行河曲卓

矣義方日嚴嗣續積厚慶鍾發祥元哲定命訐
謨孤忠茂烈惟帝念功殊恩森列紫誥
推封崇階昭揭子奮孫騫如金如玉景福家聲
咸欽芳躅河嶽匪公罹荼酷天實難堪人奚
能贖公昔獲同朝胥規胥飭仕或後時聞風慕
德凶問來聞曷勝悲惻千里茲觴公其來即

祭大名兵憲劉栢山文

剛毅質直自昔稱仁儼巧便給殊態競臻公稟
矯矯獨契道真超然物外寧雜埃塵奮迹西河

中臺司直勁節獨持純誠內植擊奸替否危言
正色歷忤大寮微纏慨即嗟古直道疇曰能容
左遷秦隴復適吳淞怡然就道肯或懂懂量移
遼左旋入眉邛淹歷遐荒德深施普帝念直
臣擢憲中土爰陟戎行鎖鑰畿輔盡瘁鞠躬王
事靡盬一疾云何遽隔今古公叨聯官守遙景
德輝誰謂河廣願言竟違賄賂肇備馳達郊畿
臨風長慟神慘心飛

祭紹興節推羅容齋文

鳴呼容齋胡遽至是耶追惟丙辰歲暮秣馬南
征梁園執手劇論深更予視君神完氣盛音吐
鏗鉤意君榮名之始奮邁勳烈於周楨也揭來
幾許君遽至是耶自君入越上下歸賢聲稱方
布哀訃來傳予獨疑出於嫌忌者之口揆諸理
豈曰其然蓋君含私之度克勝乎大受淳龐之
德宜躋乎高年而今竟已也謂之何哉謂之何
哉賢科初試數月不延老親弱子旅櫬遙旋知
君之目未瞑矣嗚呼禍福修短誰執其機茫茫

天道孰叩其微春華倏萎晨露何晞撫棺悲慟
魂兮來歸

祭先師艾峯姜公文

倬矣我師降神海嶽學為儒宗道寔先覺絀緒
丘墳沉潛禮樂弱冠巍科蜚聲遼邈南宮通籍
始試山陽南北孔道將迎未遑我師莅止庶軌
畢張民嬉政成絃誦洋洋嘉績流聞蘭臺召陟
正色昌言邦之司直繡斧玉書省巡代北獨振
風裁式是庶職維時悍卒憑竊堅城振揚天威

慎修堂集 卷三十一 七
反側以平維時鼠竊潢池弄兵廼殲渠魁脇從
更生饑饉流移開倉誕賑宗子喧逐正靜以鎮
考俗省風周歷三晉糾正官邪貪夫解印再按
畿服臺府風生惟 帝念功遂貳神京翱翔
龍陛寤寐鷗盟明哲在躬竟迈茅衡謝傅東山
溫公洛下望繫蒼生聲揚華夏獨步詞場寧知
代謝曾幾何時奄然乘化追惟甲午典盛賓興
簡司明試我師是承寶鑑空懸若水若冰棟
梁榱桷明堂並登小子顓蒙自惟擯棄曲荷甄

收謬叨上第示以先民栽培激勵錫以瑤篇星
虹昭揭訓誨周至恩私邳隆惟茲罔極寔並
穹驚傳師計方伏蒿蓬漣如浹涕五內悲恫往
出詞垣茲藩東國伊邇門墻聿懷明德驅車裹
糧展謁瑩域炙雞絮醅爰寫哀盡古云知己奚
翅感恩生平遭值我師兼焉迂庸贈證良愧師
門如一之儀寤寐存存吁嗟我師宏猷未究自
今小子取正奚就期克有樹以對高厚英爽常
存啟其固陋

祭門人知縣李西灘文

吁嗟西灘胡止於茲宏猷卓識百未一施盛年
射策公輔方期山城小試上下咸宜罹疾來歸
羣黎戴戀尚冀飛鳧再臨畿甸德教大行陽和
普徧夫何閔凶洊臻災變骨肉險釁自夙罕聞
作德賈禍廼見於君都亭聞訃悽惻心薰茲緣
奉土特吊荒墳皎皎風神依稀在目咨嗟涕洟
詎云匍匐子矣遺孤孰為撫育紛若橫侵孰為
黜伏惟君與我道義交深緬懷今昔千載此心

甘馨在几旨酒盈斟靈其降止鑒此悃忱

祭封君郭清泉公文

惟公挺生孕靈河嶽弘大溫恭允矣先覺內朗
黃中外尚渾朴探討典墳從容禮樂含貞履素
賁于丘園淵冲
嘿謝絕囂喧永言作德垂裕
後昆發祥介祉子奮孫騫倬矣阿衡詞垣矩矱
作
帝股肱贊襄帷幄謀猷入陳孤忠謇諤品
流出甄棟梁丹腹百官董正邦家之光鴻勳嘉
績照耀旂常邈本探原寔自義方
王命三錫

袞五章紫誥鸞回金緋鶴賁玉署天曹華塔
並馳承命益恭不求不忤自視歆然始終一致
杜門掃軌寧靜無營仁周族鄙義洽鄉盟優游
物表洛社耆英兒童走卒莫不知名眉壽萬年
假樂百福天不憖遺大命奄倏哀訃上聞 皇
恩輝煜鬱鬱佳城清漳之澳維公壽考矍鑠康
寧踰七望八為世儀刑維公福履頭黑紆青蟬
聯金紫偕享遐齡維公 祚濟濟後先阿衡一
德格于 皇天五福具備衆美兼全考終歸命

奚憾登仙子眇小子往奉顏色訓誨殷勤示以
懿則哲人云亡曷勝驚惻千里緘詞用告哀盡

祭進士楊新齋文

惟公以沉潜慎密之資勵剛毅堅貞之志方其
為諸生也討探墳索奮然欲得古賢聖之心及
舉進士令青齊也拮据撫摩慨然欲並古循良
之烈焦思殫慮任怨任勞日孜孜然以一政未
敷一民失所為已罪中是不食而又繼之以夜
身雖臥疾而惟欲物得其平誠所謂鞠躬盡瘁

慎修堂集 卷三 三
以死勤事者矣可不謂賢乎夫賢越乎時則宜
大行于世澤及於物則宜受祿於天此理之恒
也夫何秩不過中士仕未及再朞年甫踰強仕
而遽齋志而終耶長途方騁大數倏窮豈天固
難謀而理不可必耶蕭蕭丹旆千里來歸慈親
垂白晨露晞微寡妻弱息孺子疇依公之歿謂
非君子之深悲耶公既聯世講復締姻盟心期
既久共示周行昔送公往笑語橫生今臨公殯
入門失聲歲月曾幾永隔幽明式陳薄奠詎盡

哀誠

祭外舅雲泉田公文

惟公性植真純行持抑畏外示渾涵中區涇渭
敦族睦鄉居仁履義束髮華顛無載爾偽經營
四方以大門祚振起方隆云胡咎獲匪謀弗減
匪人疏附損益盈虛亦時與數豈弟得祿仕籍
揚名衡門卒歲泉石佳盟烟景自賁退讓無爭
機械淨盡心迹光明壽考強健宜介遐齡云胡
一疾倏即杳冥里傾善士族失儀刑追懷太息

輿念匪寧公情聯骨肉痛切肺腸沓若涕隕戚
若心傷顧瞻筵几祇薦壘觴靈爽如在鑒此徬
徨

祭彰德二守同年阮相山文

追惟早歲明試于鄉司我衡鑑時稱大方胥以
文售連茹賓王並遊英俊其樂洋洋公獨惠我
示我周行共期祇植丕績奮揚公仕郡邑于雍
于梁予廼嗣莅再謬臬章道義交勗永矢弗忘
公撫疲瘠允矣循良天水之野蔽芾甘棠閱歷

時歲令聞彌彰投閒林樾歛德潛光良朋選勝
竟日徜徉方綏福履與時行藏神不可度倏爾
云亡惟公位秩象服輝煌惟公壽考踰七而康
濟濟祚如珪如璋奮翼豈遠雲際高翔聯榮
競秀文業彌昌寔惟訓誨永世與長公同袍契
誼曷任悲傷公其聞乎薦此豆觴

祭叅軍劉中軒文

惟公植性溫恭和平易直外著中含渾無矯飾
弱冠明經日勤學殖揆翰擣文蔚然有則卒業

辟雍馳聲京國慕切親闈承懽奉色萊綵踰躑
舞前戲側並奏塤箎愉愉抑抑和氣充庭親心
大得銓試天曹雄文炳焯異等優居贊襄帥幕
雅志尊鱸不縻好爵神武掛冠飄然有作高蹈
林丘優游綽綽玉季金昆蒼顏共樂或勸或酬
聯翩矍鑠蘭桂盈階芬芳灼爍競秀駢竒率循
矩護百順方殷介茲景福壽考康寧期頤可卜
未疾云胡遽罹不淑玉樹霜凋虞淵日伏詎意
幽人云已奄速善類心摧輿情淒蹙公道義心

期定交自夙形迹兩忘情逾骨肉昔及公門懽
迎鼓腹今陟公堂悲傷滿目皎皎風神猶懷往
昔藏棺蔽帷幽明遂隔撫膺長號五內哀迫奠
斝陳詞庶幾昭格

又代作

嗚呼惟公與予締交卅角接席連床師門共學
公器溫純若玉在璞甌勉自強若加追琢與物
坦夷宅心端確蟬蛻洪阿光明卓犖有善我同
有疑我覺麗澤相觀胥期嶽嶽迨乎弱冠同入

慎修堂集 卷三 三
成均並遊英俊友誼愈惇中年筮仕結綬 楓
宸銓曹異等首幕我賓衆為公悅膺任可因飄
然遐舉志在鱸尊 清時嘉遯丘壑仙真予羈
東土違遠三春懷公非邇伊鬱疇伸遂投章甫
故國相親風晨月夕野服綸巾婆娑林樾漁釣
河濱爰敦世講復結良姻徜徉投老擬共終身
无妄邁疾勿藥已臻步武輕便談笑紛輪云胡
永別祗隔昏晨童穉相依于焉四紀倏異幽明
悲辛曷已莫挹儀刑莫隨杖履淚灑纒帷名與

蒿里薄奠式陳澗蘋沅芷悽愴曷窮靈其鑒止

祭經歷周龍田文

惟公之心光明正直惟公之貌溫恭謹敕克孝
且弟懿德性成惟靜惟嘿寧有譏評抗志先民
覃思丘索駿發文詞鏗錮繩尺秀拔儒林業成
國學英俊並遊咸推先覺棘園屢上壯志彌銳
人擬掄魁詎止一第命不我符竟乖知遇晚試
銓衡名邑司賦謂志莫行脫屣奚顧嘉遯丘樊
鴻漸雲路冠冕羽儀鄉邦矩度余來自西仍偕

樂聚考德論心周間晨暮有疑必質有速必赴
水滋山巔時親杖屨繼締姻盟寔緣衷素三紀
情深道義旨趣公不少留天胡可籲昔人所嘆
朝露易晞后昆克振不朽斯歸惟公諸郎學勤
熙緝競秀象賢揚休山立有臉孫曾如圭如錫
竇桂謝蘭濟濟惠迪世美若斯宇內疇匹門祚
閔崇帝眷可必如公疎慵夙資三益不覲幾何
生死永隔昔躡公門懽迎笑語今望公筵心摧
色沮醜醢駢羅清尊頻注追念舊遊出涕如雨

祭徐母袁淑人文

河南僉憲蓮峯
臨汾令蓮渠母

於惟淑人克全懿德名闕承休世臣作匹內政
虔共肅雍壺闕繫藻靜嘉士女維則克相元戎
翼嚴宣力爰整六師以楨王國載育二龍義
方訓切璧合珠聯顯印純潔策射魏科鴻名昭
揭德望文聲如軾如轍澄清中土有美長君天
錫仲氏福我河汾士遵啟迪民樂耕耘廉平偉
績卓矣不羣薦剡廷揚宣昭義問揆厥由然亦
云慈訓循陔思養人吏交迎兩署迭就今昔莫

慎修堂集 卷三 三十一
京方殷燕喜倏莫兩楹令名壽考寔備袞榮順
化而往亦復奚恨仁侯于征曷適我願旆旒有
翩首丘故里祖祭尊牢庶格筵几

祭陽曲輔國將軍無逸文

惟公天支之胄也福豐而澤遠秩峻而地清
古所謂盈滿不期而至者世方窮心志之所欲
為以明得意也公獨悅禮樂而敦詩書取元聖
格君之要訓作所以自規而動靜食息未始或
違焉且訥然言若不出口退然身若不勝衣儒

碩未能或之先何哉盖公字誠之質易直之心
溫恭之度其植諸內者深以厚也故能蟬蛻疇
尚之中挺立高明之表寓內可二二見耶上邈
丘墳旁搜圖史韋編綺籍充棟盈庭俯首下帷
日親賢聖湛然世慮恬不嬰情閒則闢芳園開
曲徑喬松脩竹異卉奇葩芬芳馥郁於清池白
石之間日延賢士大夫探討古今上下其議論
若饑渴於食飲然者名流墨客陟降徜徉竟日
忘歸豈直以地幽境勝然哉覲德飲醇如縻好

爵自依依不欲違耳夫以公之冲懷雅度樂善
好施雖躋上壽介繁祉宜也胡一疾而遽至斯
謂之何哉然令名卓行百世不磨玉樹瓊枝克
紹懿矩公又奚憾耶公生平契篤道義交深別
公幾何胡乃永隔每過公居未始不軫雍門之
涕興西州之悲惟堂一慟公其知乎

祭高苑知縣同年劉金溪文

聿懷甲午明試於鄉鑑衡司柄側陋明揚胥以
業進連茹賓王英遊先後其樂洋洋公寔惠我

日示周行共期奮績於主用光公尹海岱民救
政荒蒿目觸念矢志恢張心勞力殫期底民康
上不見信謂循為狂齟齬裁抑萋菲若簧良驥
方迅反為黃長劔甫試摧鋸折銕尤豈自致
人之無良臧否變幻夷跖已羊冲懷超脫得喪
兩忘石田荒野耕鑿徜徉遊情詞藝短什巨章
詩書繼業世澤允長訓誨嗣續式穀義方惟公
雅度處約若常惟公磨質練習典章惟公高識
不計筐箱位未稱德志願莫償尚期遐壽俾熾

慎修堂集 卷二十一 三十一
俾昌睽隔曾幾遽哭棺旁四紀契誼情若刃傷
風儀莫挹痛寄茲觴。

祭長男邑學生孟禎文

嗚呼痛心汝年幾何而遽舍汝祖母父母及妻
子弟妹而何之也吾生之困頓苦辛坎壈摧挫
抑至此極也吾十歲而孤零丁子立世味備嘗
矣二十乃幸舉於鄉二十六而汝生汝祖母以
予早孤且得汝之艱也拊汝育汝豈啻若子已
哉汝生七年而知勵學十三而能屬文十五而

場屋之文習熟予每督課汝必竊自慶曰生子
若是足慰人心私懷所希冀汝者何如而今乃
如此耶汝祖母所祝願汝者何如而今乃如此
耶我之遊梁也校文問俗遍歷封疆在外者恒
十九汝率先諸弟肅門禁密防閑一水一菜不
輕入俾吾得馳驅畢力而無內虞者以汝也自
今奚賴哉世之短折者類於器識行履占之矣
汝生而凝靜端重人之敬羨出自其素心稍長
即條理分明幾微洞識間嘗以疑事試汝不數

語輒犁然當予衷與人居沉嘿淵涵訥然言若不能出口退然若不勝衣吾每察識汝自幼及今未始有一念之乖違一言之誕謾至於非僻凌蕩之事日惴惴然惟恐或浼乎其身純一之心確然其未失也故宗族稱汝敬朋友信汝忠鄉黨悅汝遜師帥與汝賢予每意汝器足以致遠學足以潤身才足以利用行足以流光而今不然也謂之何哉豈脩短有定人事莫能預耶抑吾愆深戾積神明降罰乃奪我佳兒之速耶

垂絕之辰尤力視祖母及予疾首蹙額屢欲悲號而不能成聲執弟之手而不能成言汝心之痛楚憤抑誠不能舍汝祖母父母及妻子弟妹而他之也汝之心予知之矣汝之痛予何日能忘耶吾平生勤苦僅能立門戶今年近始衰所賴以督率諸弟紹續箕裘者以汝也而汝乃溘然長逝矣自今已往予尚何意於人間事哉惟當杜門掃軌率汝諸弟上奉老母以樂天年次撫汝妻俾完弦節下育汝子女幸其長成以慰

汝於冥冥而已嗚呼言未出而淚已零言有窮而意無盡汝其知之耶其不知也耶嗚呼痛哉

祭長男婦王氏文

嗚呼長婦汝年幾何而遽棄汝子而長逝耶汝子之孤阨險艱一何至此極耶汝子生甫三月而汝夫見背時汝年十九耳即堅貞勵節矢志匪他保育遺孤心勞力殫今幸而成立七學可承汝之有功於吾門豈其微哉今夏汝子獲列膠庠頃迎子婦來歸而汝竟未及享一日之養

也任其勞而莫食其報謂之何哉謂之何哉春初邑大夫嘉汝之行欲達于憲使揚美表閭予以汝年與制格且懼干名力為沮止令待後期孰意汝遽至此耶然汝苦節貞心可貫金石令名卓行永世昭垂生順死安亦復奚憾但我及汝姑衰年值此情奚以堪繼自今惟訓育汝子及婦俾克有樹立以成汝志以慰汝於無窮茲當首七特設奠筵親族咸在汝其格焉

慎修堂集卷之二十

慎修堂集後序

余竊不少揆遙意黃金臺高
而揖之自方弱冠不靳遠遊
履也著而受經術其下事在
嘉靖庚戌辛亥間吾郡水陽
亢公者懷老成純茂之才際

俊又清升之祀新授國史編
修挹華仙掖都人有盛觀三
晉有羽儀也望風思涉其門
舊矣癸丑余旋釋褐為郎侍
公出入承明三四年所公與
余座主閩中林先生寔同臭

味緣以獲拜下風周旋燕誨
所資皆文章詞賦非但謂一
經也於是分宜當機憎疎端
士公顧趣不共登舍遠約絲
呂張補外鑿坡無再入之榮
而余亦飄寄塞遠陵隰相望

虛盡年齒即欲發蒙厭義漸
公之教如向承明時也奚繇
哉然溯自既往亦既耳而目
之矣不須更陳然後乃見公
故攻古文詞而尤精意經史
居恒自謂曰其寔可裨身而

用則師天下故其為文宗經
制紀芟截浮疑適民生日用
之常非若世之幽昧瑋奇使
人讀之邈為弦匏鳥跡之難
詰有時體物寫志鋪采摛文
詩賦準清廟升歌靈光景福

慎修堂集 後序
三
之篇班諸結言掇韻小制區
畛奚異喻畎增於滄海所遺
慎修堂集若干卷家服父訓
簡蠹帛裂鬱湮不欲眎人積
歷三紀三衢

濟源詹公建節河東暇乃尋

諸盟府始表而出之付剗劓
氏其嗣孝廉孟禧等徵言於
余余惟東觀儒林之府飛翰
馭藻立言自其能事不有先
立乎德不朽之上術乎蓋公
他日深念自為史官閱貢千

百曠然怒之不忍寘一下列
督學中原尤重詆訶曰清熙
之世昆蟲草木咸遂長養奈
何錮人於寸晷尺幅之下夫
校藝程才具嚴功令一切矜
其不能視若昆蟲草木惟恐

傷之此其言篤矣乎仁人君
子之情哉苟尚敦龐道術斯
遠吐納眉睫之前睇易世
之下乘文施代言與金石相
傾厚故也時否俗薄有文無
質即讀淹素豹才通班馬歿

世而秀義零落無傳於草木
埒耳果且獨立於世乎蓋余
之於公鄉也生同其世道範
親炙今也後死於年遺言雋
永昔召伯所憇愛流甘棠宣
子所游封殖其樹思其人尚

及其物況忠厚之言在耳則
其人在目誦其言也有不愛
之芳如椒蘭者乎則詹公之
斯鏗也金石草木不可並日
而談矣公負經史名學馳騁
半塗未躋三事九司效彌綸

參贊之用而寬鄙敦薄其風
可師天下與來世是故立德
立言而於功兼之曰三不朽
噫人懷桑梓非斯人吾誰與
歸降今而後誄德銘功乘景
鑠於無窮則斯言之傳其亦

有功於公哉公出入本末具
詹公前序中

賜進士出身累階資政大夫都
察院右副都御史郇陽七十
四叟何東序崇教甫頓首拜
書



題後

慎修堂集者明四川方伯臨
 汾亢公水陽先生之所著也
 自詩賦序記迨雜著狀誄凡
 二十卷萬曆甲辰鏤板行世
 歷今七十年散佚不可考其

慎修堂集

四世孫麟聲重為校輯謀更
剖之而屬余識其後余竊聞
歐陽子之說矣其為人求序
先集也始則論其文之能傳
終則論其傳之有待且舉刪
正詩書及弟子之紀次荀孟

為之佐証嗚呼文章之垂後
世先德之耀來茲豈不賴後
之人哉余既受而卒讀觀集
中所載如嚴義利之辨通朱
陸之說取韓李之原性復性
歸之程子之定性誠足考鏡

道真羽儀濂洛也以公生嘉
靖之季維時浮華相扇家矜
才子而忽聞提示正學較然
可謂守我歲寒卓乎自立者
矣其在翰林也有讀書記有
經學史學諸論在外臺也有

興學記有試士論策著作斐
然為世懷誦可謂學有根柢
涵茹古今者矣如歐陽之論
文之能傳也必曰事信曰言
文於公不信然乎迄今慎修
之堂猶然鞞聲之所丹雘而

處也由其名而求之本所學
而學之遺書在是炳若丹青
以之為指授為頌法不啻如
捧手而相詔焉其能執盈思
慎紹聞聿修出而大用於當
世以光厥緒念古人之述祖

慨然於高揖七州之句不更
見河汾之澤有源遠而流長
者乎因題其後而歸之

康熙十有五年丙辰中秋
江南後學盛符升敬題

重修慎修堂集乞言

先曾祖方伯公諱思謙字子益號水陽
世籍晉之臨汾嘉靖甲午由儒士中本
省解元丁未殿試二甲第一人授翰林
院庶吉士歷編修癸丑分校禮闈辛酉
遷陝西按察使監秋試尋陞山東右布
政使再轉四川左布政使所在樹有政
績崇祀名宦鄉賢平陽誌人物傳載其

行實至於生平著作則有慎修堂集自
奏議以迄詩賦序記凡二十卷先祖濬
川公梓以行世先伯維烈公先君建烈
公再修葺之迨鼎革以來藏板殘闕佚
帙僅存瓊愧謏劣有忝繼述竊念是集
也先曾祖立朝大節在焉家學淵源在
焉文章政事在焉前人既修明之惟謹
予小子顧聽其散佚失傳不思垂之永

久哉敬集佚帙再付剞劂仰懇

名公大人特加鑒定錫之序言用弁簡首
庶幾先人遺籍久而彌光予小子世守
家藏感且不朽矣

四世孫亢宗瓊沐手謹述





四世孫 慎修堂 謹識

慎修堂

老

夫天一人稱味聖文... 又法... 慎修堂... 慎修堂... 慎修堂...

